



Sarajevo, 06.04.2010. godine

## MEDIJIMA - SVIMA

### SAOPĆENJE ZA MEDIJE

#### Revizija učinka 'Nabavka računarske opreme u institucijama BiH'

Ured za reviziju institucija BiH je proveo reviziju učinka sa fokusom na ekonomičnost i efikasnost javnih nabavki u institucijama BiH. Javne nabavke u BiH se provode po Zakonu o javnim nabavkama ('Službeni glasnik BiH', broj: 49/04, 19/05, 52/05, 08/06, 24/06, 70/06 i 12/09).

**Cilj revizije bio je da se utvrdi da li su javne nabavke u institucijama BiH ekonomične i efikasne. Revizija se fokusirala na prakse nabavki i nabavne cijene računarske opreme.**

Revizija je kao kriterijum za mjerenje učinka odredila 'dobru praksu'. 'Dobra praksa' podrazumijeva nabavku u kojoj nabavljena računarska oprema ima najbolje izbalansiran odnos tehničkih performansi i nabavne cijene.

Najznačajniji nalazi revizije su:

- Javne nabavke u BiH su decentralizirane, a institucije BiH za obavljanje istih ili sličnih administrativnih poslova, imaju prilično neujednačene standarde u pogledu nivoa i tehničkih mogućnosti opreme koju nabavljaju. Neke institucije kupuju prilično naprednu i skupu opremu, dok se druge institucije zadovoljavaju manje skupom opremom, koja se prema nalazima revizije, u većini slučajeva, može smatrati zadovoljavajućom;
- Oko 3/4 analiziranih nabavki nema dobro izbalansiran odnos tehničkih performansi i cijene, nabavke su izvršene po relativno visokim cijenama i često uz slabije tehničke karakteristike;
- Moguće su značajne uštede sredstava. U zavisnosti od vrste računarske opreme, moguće su uštede od 10% (kod desktopa i laptopa) pa do 50-72% (kod A3 kopir aparata i samostalnih CB printera). Do procjene mogućih ušteda pri nabavki računarske opreme došlo se poređenjem postignutih cijena i cijena 'dobre prakse'.
- Moguće uštede pri nabavci računarske opreme u 2008. godini na nivou institucija BiH su mogle iznositi oko milion KM, a sa trendom rasta proračuna za javne nabavke od 13% godišnje, uštede za period 2010.-2014. bi mogle biti višemilionske. Nerealizacijom preporuka iz Izvještaja, ostavlja se dalja mogućnost neekonomičnog trošenja javnih sredstava.

Kako bi se smanjila mogućnost pretjeranog trošenja i korupcije, a povećala ekonomičnost i efikasnost u javnim nabavkama, Ured za reviziju predlaže Parlamentarnoj skupštini BiH i Vijeću ministara BiH da razmotri i usvoji sljedeće preporuke:

- Uspostaviti efikasnu funkciju javnih nabavki za institucije BiH, koja bi institucionalno bila smještena u Ministarstvo finansija i trezora BiH. Mandat ove funkcije bio bi pripremanje i potpisivanje okvirnih sporazuma u različitim oblastima javnih nabavki, počevši od uredske opreme, pa na dalje. Zaposlenici koji bi bili angažirani na obavljanju nove funkcije bi trebali biti eksperti u javnim nabavkama, sa kapacitetom da blagovremeno podmiruju potrebe institucija BiH.
- Jačati ulogu Agencije za javne nabavke i njenu odgovornost u pogledu praćenja i evaluacije praksi i procedura javnih nabavki, kao i kontinuirane obuke osoblja zaduženog za realizaciju javnih nabavki.
- Uložiti dodatne napore i legislativu koja koja regulira oblast javnih nabavki uskladiti s regulativom EU.

Cjelovit izvještaj revizije učinka na temu 'Nabavka računarske opreme u institucijama BiH' može se pronaći na web stranici Ureda za reviziju institucija BiH - [www.revizija.gov.ba](http://www.revizija.gov.ba).

**GENERALNI REVIZOR**

*Milenko Šego, v.r.*